

आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 रविवार

दिनांक 21.12.2025

प्रमुख समाचार –

- 1— उत्तर-मध्य राज्य के सहरी बिकास मंत्री मनके बइठका म सामिल होइन उप-मुख्यमंत्री अरुण साव ।
- 2— पीएम आशा अभियान के तहत छत्तीसगढ़ ल दलहन अउ तिलहन फसल के न्यूनतम समर्थन मूल्य म खरीदी के मिलिस अनुमति- केंद्र ले खरीफ सीजन बर चार सौ पच्चीस करोड़ रुपिया स्वीकृत ।

अउ

- 3— आज रइपुर म छत्तीसगढ़ फिल्म विकास निगम डहार ले आयोजित “छत्तीसगढ़ी फिलिम के सफर” कारीकरम म सामिल होइन मुख्यमंत्री ।

.....

शहरी विकास मंत्री-क्षेत्रीय बैठक

छत्तीसगढ़ के उपमुख्यमंत्री अउ नगरीय प्रशासन मंत्री अरुण साव ह भोपाल म आयोजित उत्तर-मध्य राज्य के सहरी बिकास मंत्री मनके बइठका म सामिल होइन । बइठका म छत्तीसगढ़ संगे उत्तरप्रदेश, मध्यप्रदेश, दिल्ली अउ राजस्थान म मिशन अमृत, स्वच्छ भारत मिसन, प्रधानमंत्री आवास योजना, अंगीकार अभियान अउ अर्बन मोबिलिटी परियोजना के क्रियान्वयन के संगे अवइया कार्ययोजना उपर गोठबात करे गिस ।

ए मउका म उपमुख्यमंत्री ह छत्तीसगढ़ म इही पांच योजना मनके काम, उंखर प्रगति अउ भावी कार्ययोजना के जानकारी देइन । केंद्रीय आवास अउ सहरी कार्य मंत्री मनोहर लाल खट्टर ह घलो ए योजना मन ल संहरावत छत्तीसगढ़ ल हरसंभव मदद बर आस्वासन देइन हैं । “मिसन अमृत- टू प्वाइंट ओ” के कारज के समीक्षा के बेरा बताय गिस कि छत्तीसगढ़ के प्रदर्शन आने राज्य मनले जादा बढ़िया हे । बइठका म केंद्रीय आवास अउ सहरी कार्य मंत्रालय के अधिकारी मन राज्य ल मिसन अमृत के अवइया किस्त के रासि ल झटकन जारी करे के गोठ किहिन हे ।

शिवराज सिंह चौहान—विधेयक

केंद्रीय कृषि मंत्री शिवराज सिंह चौहान ह किहिन हैं कि सरकार ह नकली खाद अउ कीटनासक ले निपटे बर संसद के अवइया सत्र म एक ठन बिधेयक लानही। नई दिल्ली म चौधरी चरण सिंह पुरस्कार समारोह म ओमन भ्रामक टैग के संगे नकली खाद अउ कीटनासक बिक्री उपर संसो जतइन। किहीन कि— बेईमान कारोबारी मनके खिलाफ सख्त कारवाही करे जाही। कृषि मंत्री यहू किहीन कि “विकसित भारत—जी राम जी” योजना न सिरिफ किसान अउ श्रमिक मन बर लाभकारी ह भलुक गांव के बिकास ले घलो हर तरह ले जुरे हे। योजना ले मजदूर मन ल अब 125 दिन काम के कानूनी गारंटी हे अउ काम नइ त बेरोजगारी भत्ता के प्रावधान उपर घलो जोर दे गेहे, जदि मजदूरी देरी ले मिलही त उपराहा रासि देय के घलो प्रावधान हे।

जेपी नड्डा—जांजगीर

केंद्रीय स्वास्थ्य मंत्री जेपी नड्डा काली जांजगीर—चांपा जिला के दउरा म रइहीं। ए बेरा जांजगीर के पुलिस मैदान म साय सरकार के दू बछर पूरे के मउका म आयोजित “जनादेश परब” कारीकरम म सामिल होहीं अउ आमसभा ल संबोधित करहीं। ए बेरा श्री नड्डा ह आने—आने बिकास कारज के लोकार्पण अउ सिलान्यास घलो करहीं।

कारीकरम म मुख्यमंत्री विष्णुदेव साय, विधानसभा अध्यक्ष डॉ. रमन सिंह के संगे पार्टी पदाधिकारी अउ बड़का नेता सामिल होहीं। ऐति, उप—मुख्यमंत्री अरुण साव ह बतइन कि ए कारीकरम राज्य सरकार के दू बछर के उपलब्धि अउ सफलता उपर केंद्रित रइही।

पीएम आशा—राशि स्वीकृत

प्रधानमंत्री अन्नदाता आय संरक्षण अभियान—पीएम आशा के तहत छत्तीसगढ़ ल दलहन अउ तिलहन फसल के न्यूनतम समर्थन मूल्य म खरीदी के अनुमति मिल गेहे। एखर बर केंद्र सरकार ह छत्तीसगढ़ ल खरीफ सीजन म दलहन—तिलहन खरीदी बर चार सौ पच्चीस करोड़ रुपिया के स्वीकृति देय हे। एखर तहत राहेर, उरीद, मूंग, सोयाबीन, अउ मूंगफली के खरीदी करे जाही।

मुख्यमंत्री विष्णुदेव साय ह किहीन हैं कि न्यूनतम समर्थन मूल्य म दलहन—तिलहन के खरीदी किसान मनके हित म बड़का फइसला हैं। एखर ले किसान मन ल अपन उपज के उचित मूल्य मिलही अउ उंखर आय म घलो बढ़ोतरी होही।

बतादन कि छत्तीसगढ़ सरकार ह केंद्र सरकार ल खरीफ अउ रबी सीजन बर एक लाख बाईस हजार मीट्रिक टन दलहन—तिलहन खरीदी के प्रस्ताव भेजे रिहीस। एखर बाद केंद्र सरकार ह मांग बाढ़े म सोयाबीन अउ मूंगफली बर उपराहा स्वीकृति के घलो आस्वासन देय हे।

गृह मंत्रालय—अग्निवीर

केंद्रीय गृह मंत्रालय ह सीमा सुरक्षा बल—बीएसएफ म कांस्टेबल भर्ती बर पूर्व अग्निवीर मनके कोटा ल दस प्रतिसत ले बढ़ाके पचास प्रतिसत कर देय हे। पूर्व अग्निवीर मनके पहिली बैच ल उपरी आयु सीमा म पांच बछर के छूट मिलही। उन्हें, बांचे पूर्व अग्निवीर मन ल तीन बछर के छूट मिलही। अधिसूचना म कहे गेहे कि पूर्व अग्निवीर मन ल शारीरिक मानक अउ दक्षता परीक्षा ले घलो छूट दे जाही। यहू कहे गेय हे कि हर भर्ती बछर म पूर्व अग्निवीर मन बर जघा खाली रइही।

मुख्यमंत्री—छत्तीसगढ़ फिल्मों के सफर

मुख्यमंत्री विष्णुदेव साय आज रइपुर म छत्तीसगढ़ फिल्म विकास निगम डहार ले आयोजित “छत्तीसगढ़ी फिलिम के सफर” कारीकरम म सामिल होइन। ए कारीकरम छत्तीसगढ़ राज्य स्थापना के रजत जयंती के मउका म आयोजित करे गिस। ए बेरा मुख्यमंत्री ह छत्तीसगढ़ी सिनेमा के बिकास यात्रा उपर अपन बिचार साझा करत किहिन कि छत्तीसगढ़ी सिनेमा आज नवा दउर म प्रवेस कर चुके हे। अवइया बेरा म छत्तीसगढ़ी फिलिम राष्ट्रीय अंतर्राष्ट्रीय स्तर म प्रदेस के कला संस्कृति अउ चिन्हारी ल बगराही। मुख्यमंत्री ह आस जतइन कि छालीवुड के भविष्य बड़ सुधर हे अउ फिलिम उद्योग ल नवा ऊंचाई तक अमराय म सरकार ह हरसंभव सहयोग प्रदान करही।

कारीकरम म मुख्यमंत्री ह छत्तीसगढ़ी सिनेमा ले जुड़े निर्माता अउ वरिष्ठ कलाकार मन ल सम्मानित करिन।

पीआईबी—श्रम संहिता विशेष वार्ता

पत्र सूचना कार्यालय—पीआईबी के क्षेत्रीय कार्यालय डहार ले काली रइपुर म “भारत के श्रम सुधार: चार श्रम संहिता लागू” बिसय उपर एक ठन बिसेस वार्ता कारीकरम के आयोजन करे जाही। कारीकरम म विभाग के बड़का अधिकारी अउ बिसय बिसेसज्ञ भाग लिहीं, जउन श्रम संहिता के परभाव अउ भविष्य के कार्ययोजना उपर जानकारी दिहीं। ए वार्ता केंद्र सरकार डहार ले इक्कीस नवंबर के लागू करे गेय चार ठन ऐतिहासिक श्रम संहिता मनके दूरगामी परभाव, क्रियान्वयन अउ भावी कार्ययोजना उपर केंद्रित रइही।

जवान—मौत

नारायणपुर जिला के छोटेडोंगर के तिर कड़ेनार कैप म अचानक गोली चले ले डीआरजी के जवान बलदेव सिंह हुरा के मउत होगिस। मिले जानकारी ले डीआरजी के टीम ह छोटेडोंगर इलाका म तालासी अभियान म निकले रिहीस हे, ओखर बाद लहुटत बेरा जवान के बंदूक ले ही अचानक गोली चलके मुड़ म लागे ले घटना होइस।

मोहला मानपुर—विवाद

मोहला—मानपुर जिला के सीतागांव म वनभूमि म बने घर मन ल टोरे बर पहुंचे राजस्व अउ वन करमचारी के संग ग्रामीन मनके झगरा होगे। एखर बाद तिर—तखार गांव के सैकड़ों लोगन सकला गिन। तनाव ल देखत इलाका म भारी पुलिस बल तैनात करे गेहे। उहें, एसडीएम, तहसीलदार अउ वन विभाग के संग पुलिस अधिकारी घलो मौजूद हैं।

बतादन कि वन विभाग ह कारवाही ले पहिलिच करीबन एक दर्जन घर ल टोरे बर नोटिस जारी करे रिहिस। एखर बाद घलो कब्जा नइ हटाय म राजस्व अउ वन विभाग के टीम ह कारवाही करिस।

पल्स पोलिया अभियान

पल्स पोलियो अभियान के तहत आज राजधानी रइपुर संगे प्रदेशभर म सून्य ले पांच बछर के लइका मन ल पोलियो के खुराक दे गिस। जउन लइका आज पोलियो के दवा पिये ले छूट गिन हैं, ओमन ल काली अउ परनदिन माने बाईस अउ तेईस दिसंबर के स्वास्थ्य टीम ह घर—घर जाके पोलियो के दवा पियाही।

“कैरा वैन फेस्ट”

छत्तीसगढ़ पर्यटन बोर्ड डहार ले काली रइपुर म “कैरा वैन फेस्ट” के आयोजन करे जाही। ए कारीकरम “अ शार्ट जर्नी इन टू द हार्ट ऑफ छत्तीसगढ़” के थीम म होही। ए कारीकरम म लोगन मन ल परकीति अउ संस्कृति के सुध्धर संगम देखे बर मिलही।

भाकपा—शताब्दी वर्ष

भारतीय कम्युनिस्ट पार्टी के स्थापना के सौ बछर छब्बीस दिसंबर के पूरा होही। ए मउका म पार्टी ह छत्तीसगढ़ के संगे देसभर म सताब्दी बछर मनावत हे। इही कड़ी म पार्टी के डहार ले जगदलपुर म एक ठन रैली निकाले गिस, जेमा बस्तर संभाग के अलावा राष्ट्रीय स्तर के नेता अउ कार्यकर्ता सामिल होइन।
